

**Agong Berangkat Ke Istiadat Menghadap, Pengurniaan Darjah Kebesaran Bernama  
1 Jun, 2013**

KUALA LUMPUR, 1 Jun (Bernama) -- Yang di-Pertuan Agong Tuanku Abdul Halim Mu'adzam Shah hari ini berkenan berangkat ke Istiadat Menghadap dan Pengurniaan Darjah-darjah Kebesaran Persekutuan sempena Hari Keputeraan Yang di-Pertuan Agong.

Istiadat yang berlangsung buat kali kedua di Istana Negara baharu di Jalan Duta di sini itu menyaksikan Seri Paduka berkenan mengurniakan darjah kebesaran kepada 1,574 penerima.

Terdahulu, Tuanku Abdul Halim dan Raja Permaisuri Agong Tuanku Hajah Haminah menuju ke peterana diraja sebelum Seri Paduka memeriksa kawalan kehormatan utama diiringi Perdana Menteri Datuk Seri Najib Tun Razak.

Pada April tahun lepas, Tuanku Abdul Halim ditabalkan sebagai Yang di-Pertuan Agong ke-14 dalam acara penuh istiadat di Istana Negara berkenaan.

Pertabalan bersejarah itu menyaksikan Tuanku Abdul Halim dilantik semula sebagai Ketua Negara sejak sistem giliran memegang jawatan dalam kalangan sembilan Sultan dan Raja Melayu dipraktikkan selepas Malaysia mencapai kemerdekaan pada 1957.

Tuanku Abdul Halim pertama kali ditabalkan sebagai Yang di-Pertuan Agong Kelima pada 1970 semasa berusia 42 tahun, dan kini empat dekad kemudian, Seri Paduka ditabalkan sebagai Yang di-Pertuan Agong ke-14 pada usia 84 tahun.

Istiadat Pengurniaan Darjah-darjah Kebesaran dimulakan dengan lagu kebangsaan 'Negaraku' sejurus keberangkatan tiba Tuanku Abdul Halim dan Tuanku Hajah Haminah di Balai Rong Seri.

Seterusnya, perdana menteri menyampaikan ucapan sembah tahniah kepada Seri Paduka bagi pihak kerajaan dan rakyat Malaysia.

Tuanku Abdul Halim turut menerima ucapan tahniah daripada Doyen Kor Diplomatik, Duta Kemboja di Malaysia Norodom Arunrasmy yang mewakili Ketua-ketua Perwakilan Asing di Malaysia.

Seri Paduka menyampaikan Titah Diraja dan kemudiannya berkenan mengurniakan darjah-darjah kebesaran kepada 43 penerima hari ini.

Istiadat pengurniaan darjah-darjah kebesaran dimulakan dengan penganugerahan kepada Tuanku Laksamana Kedah Tuanku Abdul Hamid Thani Sultan Badlishah (ahli Jemaah Pemangku Sultan Kedah) yang dikurniakan Darjah Panglima Seri Mahkota (PSM) yang membawa gelaran 'Tan Sri'.

Istiadat pengurniaan seterusnya kepada Ketua Setiausaha Negara Datuk Seri Dr Ali Hamsa, yang menerima Darjah Panglima Mangku Negara (PMN) yang membawa gelaran 'Tan Sri'.

Seramai 45 individu lain dikurniakan Darjah Panglima Setia Mahkota (PSM) yang turut membawa gelaran 'Tan Sri' hari ini, antaranya bekas Menteri Penerangan Datuk Seri Dr Rais Yatim, bekas Menteri Tenaga, Teknologi Hijau dan Air Datuk Seri Dr Peter Chin Fah Kui,

Ketua Pengarah Perkhidmatan Awam Datuk Mohamad Zabidi Zainal, Ketua Setiausaha Perbendaharaan Datuk Seri Dr Mohd Irwan Serigar Abdullah dan Ketua Pengarah Unit Penyelarasan Pelaksanaan (ICU) Jabatan Perdana Menteri Datuk Shukry Mohd Salleh.

Ketua Pesuruhjaya Suruhanjaya Pencegahan Rasuah Malaysia (SPRM) Datuk Seri Abu Kassim Mohamed, Ketua Setiausaha Sulit kepada Perdana Menteri Pejabat Perdana Menteri Datuk Seri Ab Aziz Kasim dan Naib Canselor Universiti Teknologi Mara (UiTM) Prof Datuk Ir Dr Sahol Hamid Abu Bakar dan Datuk Michelle Yeoh Choo-Kheng turut dikurniakan PSM.

Selain itu, 59 penerima dikurniakan Darjah Panglima Jasa Negara (PJN) yang membawa gelaran 'Datuk'. Antara yang menerima hari ini ialah Ketua Setiausaha Kementerian Sains, Teknologi dan Inovasi Datuk Dr Madinah Mohamad, Ketua Setiausaha Kementerian Pelancongan Datuk Dr Ong Hong Peng, Ketua Setiausaha Kementerian Pertanian dan Industri Asas Tani Datuk Che Mohd Hashim Abdullah, Perutusan Tetap Malaysia ke Pertubuhan Bangsa-Bangsa Bersatu (PBB) Datuk Gulam Hussin Gulam Haniff.

Pereka fesyen antarabangsa Zang Toi, Pengarah Urusan Yeo Hiap Seng Berhad Tan Teow Choon, Duta Jenama Malaysia/Pereka Kasut Antarabangsa Datuk Choo Yeang Keat (Jimmy Choo), Panglima Markas 8 Briged, Markas Briged 8 Brig Jeneral Datuk Mohamad Zaki Hamzah dan Panglima Operasi Udara, Tentera Udara Diraja Malaysia Leftenan Jeneral Datuk Seri Ackbal Abdul Samad.

Sementara itu, enam individu dikurniakan Darjah Panglima Setia Diraja (PSD) yang membawa gelaran 'Datuk'. Dua individu menerima darjah pengurniaan itu hari ini iaitu Pegawai Khas kepada Perdana Menteri Profesor Dr Datuk Khairil Annas Jusoh dan Ketua Protokol, Jabatan Protokol Kementerian Luar Negeri Datuk Naimun Ashakli Mohammad.

Istiadat pengurniaan diakhiri dengan bacaan doa oleh Mufti Wilayah Persekutuan Datuk Wan Zahidi Wan Teh sebelum para penerima darjah kebesaran menikmati jamuan ringan bersama Seri Paduka berdua.

Hari keputeraan Yang di-Pertuan Agong secara rasminya disambut pada setiap Sabtu pertama bulan Jun, tidak mengambil kira tarikh hari keputeraan sebenar mana-mana Sultan atau Raja-Raja Melayu yang sedang memegang jawatan Yang di-Pertuan Agong.

Bagi tahun 2013, hari Sabtu pertama bagi bulan Jun ialah pada 1 Jun.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=953453>